

玉山璞稿

春暮有懷琦龍門兼呈于匡廬袁子英春草池綠
波亭上作

綠波亭上風光好水荇菖蒲叢雜生出林柳花作團去
放子鯉魚成隊行美人不見有新夢春事欲歸生遠情
明當與君洗大白濁酒百壺相對傾

董孟起叅政領水軍副都萬戶開水軍府事二月
廿三日以瑛佐治軍務留海上索詩口占奉呈

玉山顧

瑛



燕頷將軍虎豹顏，去年殺賊下三關。
筆端草檄千鈞力，馬上開弓一石彎。
定賞名標丹鳳宸，論功身在紫薇班。
今看耀武回滄海，日日從軍奏樂還。

張仲舉待制以京中海上口號十絕附郊九成見

寄瑛以吳下時事復韻答之

估販年來不受法，徒勞蹤跡走通衢。
祗緣畫要新交鈔，除却天都到處無。
帶號新軍識未真，攔街作隊動生嗔。
官支爛鈔難行使，強買鹽糧更打人。

白晝驚風海上號，水軍三萬盡乘濤。
書生不解參軍事，也向船頭著戰袍。

官鼓鼙鼙報二更，船頭風浪盡軍聲。
不知海若緣何事，一夜顛狂直到明。

冉冉長蛇漢水東，嗆成黑霧滿虛空。
腥風恠雨重陰底，化作黃蚪不是龍。

莫辨黃鐘瓦缶聲，且携斗酒聽春鶯。
河西金觥新翻語，漢語夷音唱滿城。

紅綠油牌去復來，長身碧眼更頽顛。
口傳催辦軍需事，

一日能無一百迴
築得吳城易得催年年風雨繞蘓臺農家盡患時行病
搃為修城染帶來
紅纓白帽錦鞍韉鐵甲金戈刺繡鞭義士一千屯海上
自家供米又供錢
和糴糧船去若飛兼春帶夏未曾歸用錢贈米該加七
納戶身懸百結衣

官糴糧美山東趙公伯堅也公以江西行省檢校
官來浙右糴米十萬石賑飢至是吳民苦於官
糴公一無所擾而官亦不勞而集瑛雖不才敢
恊白居易體作是謠使吳民歌以餞其行云

官糴糧官糴糧東吳之民日遑遑去年今年来侍郎凜
凜六月生秋霜官錢未給先取將今朝十萬上官倉明
朝十萬就船裝小斛較斛大斛量吏弊百出那可當輸
錢索物要酒漿磨牙吮血如虎狼滿身鞭箠成痍瘡郡
侯視之泗滂濠忍使吾民罹厥殃實欲止之無計張官
糴糧官糴糧東吳之民無積藏山東趙公來南昌南昌
殺賊如犬羊賊雖解圍民亦荒貧者守死富食糠愛民

誰如趙平章手發官帑錢百囊公既得之夜乘航緣江
逋賊肆獗倡操舟帕首來取攘我公挽弓一石強百發
百中賊始亡倍道十日抵蘓抗誓不移文下官坊微服
民間身作商指廩發粟酬其饋十萬月就民不傷千艘
萬斛如龍驤黃旗赤幟分兩綱南風開船若雁行船頭
擊鼓聲鏗鏘六月牽江過鄱陽新米未熟舊米香江西
之民無枯腸官糴糧官糴糧粒粒盡是民脂肪天子端
居白玉堂相君峩峩坐廟廊紫衣未服列兩廂天門九
重啓煌煌豹躡虎踞嚴其防覆盆不照日月光誰能奏
額在帝旁以公糴糧為典常東吳之民始安康官糴糧
官糴糧東搬西載道路長去年押糧上蘄黃今年五月
未還鄉安得風塵靜四方羊腸蜀道成康莊舟車所至
皆來王普天之民樂而昌天子聖壽垂無疆萬年千載
不用官糴糧

○三月廿三日待董大叅巡海早發路漕

檄下遲明發樓船似馬來海空初日出風急大旗開武
士森前列儒生忝後隊茲遊絕奇壯直欲到蓬萊

○是夜回宿海口舟中董叅命賦口號

夜半分弓哨海頭，千艘耀武發貔貅。
旌旗影拂三沙曉，砲石聲懸萬島秋。
六帥移文驅巨鯨，諸軍擊楫誓中流。
回頭坐見辰星近，十日糧船達帝州。

題琴川趙實甫菴甫瑞蓮圖

紫荊樹下盆池好，一朵芙蓉並蒂芳。
露井月涼栖翡翠，天機雲暖織鴛鴦。
塌簷迭奏高堂樂，鸞燕雙開半面粉。
喚取桃根與桃葉，蹋歌聯臂醉稱觴。

題深山蕭寺圖

潭潭古寺山中央，迺是梁朝之道場。
九霄臺殿起突兀，萬間金碧開熒煌。
塔鈴風前作人語，天花靜裏生空香。
青鞋布襪若可到，逗上翠微尋竹房。

題宋徽廟畫設色山仙樓觀圖

宣和天子昔神遊，鳳駕行空過玉樓。
此去有人言赤馬，歸來無路逐青牛。
分明艮嶽通玄圃，想像方壺接泖洲。
莫把仙山作圖畫，瓊花琪樹不勝秋。

題龍門草堂圖就東王仲立

龍門上人如已公，茅屋賦詩清興同。
不知白衣者誰子，無乃玉山之老翁。
長松飛花落輕粉，曲澗截山橫斷虹。

聞道城中王給事，近日讀書居溪東。

倪元鎮畫格竹圖附章心遠玄士見寄琦龍門為
題長詩于上瑛次韻以識

山人自愛山中宅，繞屋長溪深百尺。桐花委地曉風清，
竹筍過牆新雨碧。東海倪迂真絕俗，牛角漢書鋤且讀。
茅齋時有已公吟，松窓每待陳蕃宿。思之不見勞神交，
月明夜夜梁溪潮。畫圖忽尔墮几案，碧梧翠竹如其標。
生產那知金有幾，門與九峯相對峙。我才獨小不成邦，
作詩或借嵇康擬龍門。一別垂十年，客中又見秋風顛。
滿懷契闊欲陶寫，好寄錫山龍縫泉。

○題秋江釣隱圖

我愛長江上，蕭蕭八月秋。斷山當枕尾，落葉下船頭。風
起青蘋渚，沙分白鷺洲。釣竿如可得，添我一羊裘。

次琦龍門過傀儡湖詩韻

秋波無烟淨且空，畫槳搖盪雙漁童。晴沙翠竹見湖曲，
落日青山如剡中。鷗鳥翻迴蓮葉浦，菱歌忽起蘆花風。
何時磯頭聽春雨，茶竈筆床稱老翁。

送金文中常熟州吏滿陞庸司奏差

言偃祠前落木秋，擔簦負笈上行舟。盡言能吏瓜期滿，
又喜英才水部收。青草岸頭啼布穀，黃梅雨裏叫鉤輈。
農家際此愁如織，奉直承顏說得不。

題桶底圖

不數仙家狡獪功，戲將桶底指蟾宮。豈知天地山河影，
已在庖犧一畫中。

題曲江宮殿圖

千門宮殿鬱嵯峨，侍輦佳人翠畫蛾。江水江花流不盡，
斷腸元在馬嵬坡。

題仙山便面

仙山矗矗下韓東，半入青雲半入空。記得玉笙鸞背上，
相看都在月明中。

寫山居圖後

我愛山居人，青山在憲牖。朝耕隴上田，暮飲床頭酒。門無
索租吏，座有擔簦友。不知茲山中，着得我儂否。

○ 琦龍門與王仲立遊玉峯惠聚寺龍門作排律一
首以紀，寫寄草堂索瑛次韻。

瞰厓古殿當澄江，中有古佛踈眉龐。山靈運石馴虎伏，

老禪呪水神龍降。冷_七露下杪。攞葉寂_七香團。瓔珞幢
竹笋出牆雲結戶。桃花夾岸石為砵。鼉鼉隱見蟠千礎。
金碧絢八窓。我昔馬垂紅錦障。君今船繫綠楊樁。風清
齋鼓三時報。月落晨鍾半夜撞。露布未聞郵驛過。霜輦
猶聽戍樓擬。淳于夢裏空為國。曹鄴詩中不是邦。歸去
支硎亭子上。開籠自放鶴雙雙。

題徐公憲挾彈小像

絳縠裁春服。行騎白面駝。手中金彈子。切勿打慈鴉。

寫龍門草堂圖

留客茅堂下。聯詩石鼎邊。呼童拾松子。同煮白雲泉。

家翁命題任月山五馬圖

月山道人畫唐馬。筆力豈在吳興下。此圖五馬更能妙。
乃為月山居士馮居士平生好奇古。投老讀書深閉戶。
客來展卷閱權奇。颯颯秋風吹馬語。我聞大唐天寶中。
朝廷不用凌烟功。中使傳宣下五宅。一朝並入連昌宮。
望仙樓下花開早。妃子霞觴對花倒。五家沉醉夜歸來。
夫人號國爭馳道。國官牽過月明中。汗清流血耳生風。
當時圖寫落人世。至今粉墨傳遺踪。君不見唐太宗坐

下六馬皆真龍。昭陵舊刻昭落日。千秋萬歲垂無窮。

鏡歌十章并小序送董叅政

至正十有二年狂賊梗化紅帕首者動數十萬所在
蠶起廣平董公叅政江浙行省由淮西率兵復杭城
平諸屬邑戰昱嶺殲羣醜十四年春詔開水軍都府
于委上公嶺帥事平海寇也是年夏復詔判樞密院
將大用矣海隅輒生敢擬鼓吹鏡歌十曲謹書隆茂
宗描曹弗興所畫黃帝兵符圖後以寓頌美之萬一
云

克淮西言光蔡賊犯淮西公率兵轉戰所向克捷
繼召師復杭城并屬邑也第一

克淮西法羸越陣堂堂火烈烈介士奮逋賊滅杭城屹
長江撤將用良兵用捷趙用牧東胡子漢用廣匈奴懾
有永斯世垂勲業

入昌化言既定杭城復入昌化殄辟寇遂叅中書
也第二

入昌化群蠻降旗整整鼓逢逢凱歌還民樂康走馬報
入中書堂

克復於潛賊衆罪我師尚未集公徠許自新賊猶
豫持兩端公乘怠荃甲疾趨梟賊降衆也第三
克復於潛推爾鈴爾癸爾機協爾占短兵既接奇兵連
擊其怠兮渠魁殲武功烈烈民物懌繫立爾祠正謀貪
樂茲土永永年

定安吉賊據千秋關襲我軍公全憑險投石發矢
賊莫能支追數十里俘馘而還遂定安吉也第

四

定安吉揚威靈市肆不易民不驚戢艱難致太平致太
平、岷嶽未數燕然銘

攻昱嶺賊敗遁徽饒復集衆攻昱嶺公法八陣圖
為長陣亘百里遂殲群賊也第五

攻昱嶺鏖三關何物小子肆兇奸公赫斯怒八陣頌天
衝地軸居兩間白刃霜積火旗朱殷十有八戰殲群蠻
龍草來虎旅班憑闕號呼毋以我公還我公其還四海
永無患

水軍開殄海寇也海寇公肆暴焚城邑絕糧道帝
命開水軍府公領帥三踰月而功成海宇乂寧

也第六

帝命開大府軍興若雲雷鵝鶴激中流蛟蜃潛海隈萬
帑洪濤平金戈白日回國儲數萬艘飛越龍之堆洋
大東海下視不盈杯成功兩暮月內詔從天來行人無
遮留要見王業恢君王壽萬歲我公位三台

巡大洋言公開府率水軍耀武海洋濤風迅發千
艘並舉鯨鯢遁逃不十日抵京師也第七

巡大洋畧扶桑雷天發火旗張列缺翼海若蔽萬天
虎虓千艘驟不十日達帝京聖皇悅惟汝功爾德爾輔
靖四方

驅海獠海寇既平遺黨襲暴民罷市公發令驅諸
海外民情乃悅祠以祀公也第八

驅海獠莫吳民群獠肆暴吏不敢嗔公怒赫心令申獠
惴惴民忻忻請罪乞自新公威以武撫之仁吳民尸祝
報德無有垠

海之平賊匿海島肆劫掠麾水軍擒之沉其舟尸
諸市海以寧也第九

海之平海以寧挾長口批奔鯨鱗角摧毒霧腥膏鴆鹵

波不驚我公開府告公成挽海水洗甲兵

趨入朝貳樞府將大用也第十

趨入朝四牡駢七赤舄几几帝曰俞安汝止錫汝斧鉞
用輔我皇子公拜稽首受帝之祉我土我民爾安爾
粵千萬年載諸史

顯鄭白鶴喬林遠山壁傲李協律體

鐔公脚踏紅鯉魚鉄網截海鈎珊瑚腥風海底起烟霧
濃綠斜飛隔寒素影木花開九月秋亂葉撒波如雨沆
六鰲抃足三山舞白鶴夜向西池語

金華方道成鍊師以張彥輔所畫雪松圖索題就

和卷中張仲舉詩韻

金華有羽士、咬道茲山中、據松拂朱絲、晒雲飛玉龍、手
招皇仙人、排空下琳宮、白羊忽起立、萬壑生靈風

新秋夜坐有感

蘋末微風起、虛庭夜氣清、河傾天際落、星近斗邊明、坐
久新涼發、愁深百感生、豆花紅絡緯、相對放秋聲

○錢思復汎舟過玉山作詩見示次韻以復兼呈于

玉山

聞道書船盪槳行，過湖詩思十分清。幽人素有烟霞癖，之子寧無丘壑情。七月君王猶北幸，長淮丞相又南征。書生此日頭應白，無奈秋風策策鳴。

次琦龍門夜宿陳性之學舍詩韻東寄陳性之訓導時學中殿梁生紫芝故及

廣文學舍清如水，故友相遇氣吐真。翠幕燈花寒作藥，畫梁芝草淨無塵。清晨館下招諸子，長夜山中夢老親。我亦儒冠竟何補，願于東海作迂民。

寄題王孟德春雪軒

聞君帶雨種琅玕，只好稀稀數十竿。西寺故人同散逸，北堂阿母喜平安。春風細上開簾入，暗雪紛花落座寒。他日錦衣多稚子，當軒下馬為君看。

○和韓克莊崇明三沙詩

三沙宛在海當中，隱見珊瑚樹色紅。神島由來連弱水，樓船欲去引剛風。東方日出樵人國，半夜潮生織女宮。却憶題詩綉衣使，高秋曾過玉山東。

、和韓克莊題崇明官舍詩

海上開官署，龍光夜獨明。居民雜吳楚，風俗異幽并。琪

樹戎戎見雲颿箇箇輕飛塵如不到亦欲去逃名

和韓克莊題壽安寺詩

別島壓東溟沙黃草樹青金山開紺闕玉女降珠庭龍
鉢波心敲蛟機雨外聽乘槎從此去為結候獮車

和程小山春遊即事

小隊行春簇錦鞍海風習匕射眸酸雲間僧寺鐘魚答
雪後漁舟網罟寒曉挹東瀛窺若木夜瞻北極望長安
使君觀海難于水從此襟懷萬頃寬

和程小山留題壽安寺詩

公餘無事得相待每笑浮生有底忙秋水魚龍歸澤國
春風花木護雲房肯分東海安期棗共接西池阿母觴
聞道扶桑有銅柱長繩我欲繫飛光

右前詩五首崇明州朱庭瑞啓明二秀才來索和

刊入即志

予總角時拜中岳仙伯於舍下今已四十年矣思
之如神遊紫府見陶隱居累欲從之而不可得今
讀錢思復先生贈其子于匡山詩不能不為之興
懷遂次韻寓意呈思復匡山二先生云

幼年曾揖浮丘伯，口談玄經坐瑤席。我家老翁師事之，授以神丹光五色。憶從海上接盧敖，汗漫騎鯨遊八極。至今佩劍瘞空山，夜夜龍光射蒼壁。高風可仰不可見，傳家只有床頭易。鳳雛學道匡山中，羽服翩翩瞳子碧。片玉峯頭長往來，每嘆世情今匪昔。錢塘故人七月來，共看新月如弦直。舉杯邀月來酒中，不知松露霑衣濕。山中之樂樂無央，胡尔違_七苦行役。作詩為答入山人，莫作長安車馬客。

秋興十絕呈錢思復于匡廬袁子英

廉纖小雨逗微涼，何處花風度暗香。愛殺一雙飛翡翠，並啣秋色過漁莊。

又見京生白苧衣，秋光全比去年非。閑身得似梁三伯，日日玉簪花上飛。

西風忽起白蘋洲，吹落芙蓉幾瓣秋。快雨過晴涼似洗，鷓鴣啼在水西頭。

絡緯專秋軋軋啼，西樓坐待月明時。梧桐樹上無多葉，莫遣涼風滿意吹。

芭蕉細雨弄新寒，白髮高堂鏡裏看。無賴西風吹過雁，

背飏秋色上淮安

自愛玉山深處居，幽懷欲與世情疎。近來交際渾多事，始信嵇康懶作書。

颯上涼風吹菱荷，虛庭正愛月明多。秋聲忽在闌干外，驟雨滿池鳴綠波。

玉山雲氣接蓬萊，山下軒窗隔竹開。金粟池頭衣帶水，穀穀引上轆轤來。

淒風冷雨最關情，洒向芭蕉不住聲。獨有一庭書帶草，秋來猶伴鄭康成。

溪上喬木老槎牙，上有灼灼凌霄花。碧雲四合月欲上，啼殺爭栖無數鴉。

琦龍門為王氏孟德仲立求賦秋林讀書圖詩

龍門一別三月強，忽然扣門登草堂。盛言王家好兄弟，皎若丹丘雙鳳凰。近向山中結書屋，屋裏藏書二萬軸。門前一樹紫荊花，堂背兩墩慈孝竹。時當林麓西風起，木葉蕭蕭打窓紙。簡編舒卷對新涼，深夜篝燈日爭

大郎學禮可立身，小郎學詩亦有成。禘之懿之賢伯仲，元方季方雉弟兄。我生素有耽書癖，忽聞此言深嘆息。

未得扁舟逕造門，秋林漠上遙相憶。迺來吳中閱閩家，
養子不教從豪奢。白狐之裘紫駟馬，日日春風弄李花。
從此荒嬉事輕薄，盡把詩書束高閣。老來對客始面牆，
却悔青春不曾學。君不見機雲學舍小如舟，兄居東頭
弟西頭。一朝同起仕晉室，雲間名字垂千秋。又不見韓
家學舍京師中，當門只種青梧桐。聯翩冠蓋可相望，舉
世人呼兩相公。似君之家亦希有，十載讀書不窺牖。壯
年才力正踴躍，功名肯落他人後。聖元天子崇文儒，明
年並馬趨皇都。大字雙懸龍虎榜，為君題作登瀛圖。

題龍門觀泉小像

龍門一罅通青天，傾崖束峽天梯連。白雲萬疊吹不斷，
上護一脉清冷泉。上飛如龍出山去，石梁倒掛銀河懸。
下方臺殿起突兀，撞鐘擊鼓朝金仙。道人齋餘憇寂寞，
身披袈裟袒右肩。面崖跌坐入水觀，大千一息秋毫顛。
天風冷冷響天樂，舉頭忽散青松烟。何人畫法追龍眠，
塗朱點綠分清妍。貌得空山定光相，摩尼下照驪龍淵。
我今焚香三稽首，盥手摹勒青瑤鐫。嗟予鬢髮久頹狀，
未能解脫塵世愆。道人肯為一懺悔，盡滌諸垢生青蓮。

著我同坐盤石邊，更論莊生秋水篇。

送陳希文秀才北上

西風鞍馬古長洲，送子携才事遠遊。山割岷峨分地脈，水排淮泗合江流。方今丞相南征日，似昔周公北伐秋。聖主築臺延國士，虎頭食肉定封侯。

自題繆叔民惠所畫讀書巢

自向江頭採白茅，山中結得讀書巢。柳栽已發窺春眼，竹本初分帶雨梢。曲水流花斜入壑，小橋憑岸直通郊。未知何日從吾懶，且對青山誦解嘲。

和倪雲林所寄

十月清霜天始涼，家家砧杵夜搗裳。開書乃審近候好，問客兼知道味長。我尚笑談浮大白，君能服食事中黃。何當相遇一相見，帶取奚奴携錦囊。

丞相出師口號

丞相出師秋九月，十月冬後到新州。南來驛騎雨哨尾，北去糧船風打頭。軍聲如雷震淮泗，殺氣上天干斗牛。早提髑髏見明主，四海一日同歌謳。

次琦龍門所寄二詩兼柬東王氏兄弟

石橋北去路猶賒，竹裏開門是酒家。
密上踈踈雲外屋，紅紅白白寺前花。
登山著屐思靈運，落帽當風憶孟嘉。
記得天池同勝賞，歸來日脚已西斜。

龍門壁立何巉岩，海日昭耀金爛斑。
爾言秋後山更好，我獨老來身未閒。
將携綠玉杖九節去，借白雲屋半間。
為約王家兩兄弟，日七賦詩相往還。

和復翟文中知事

潯陽三世昔曾聞，况汝才如五色雲。
去歲檄詩承問訊，何時尊酒對論文。
京畿玉帛連綱入，江嶼旌旗小隊分。
筆硯書生供冗役，每搔華髮倍思君。

繆叔正郎中以漕事馳傳歷浙東諸郡渡大群小
群二灘作渡灘歌見寄次韻復之

朝上灘暮下灘，客行一日一日難。
飢蛟掉尾鱗捨齒，奔流百折何時已。
上灘萬蒿進總咫，下灘回頭條千里。
南入粵東入甌，灘流灘流去莫收。
使官乘檝過中流，船頭把舵船尾謳。
岸上村村似寒食，店舍無烟人菜色。
賊圍解去米如珠，况復雨多傷二麥。
但願班師奏凱歌，四海同日休干戈。
野無烽塵水無風波，大群小群將如之何。

三二年來高旅難行畏途多棘政以為嘆徐君憲
以雪景盤車圖求題觀其風雪載道不能無憾
然也遂為之賦云

山盤上水逐上大車前行後車促不愁雪裏衣裳單但
恐雪深車折軸行人歲暮心忉忉天寒馬疲牛腹糶日
落不知行路遙今年月尾度教鄙明年月頭過成羣二
月三月臨帝郊似聞物低米價高莫使終歲徒勞勞城
中貴客朱門豪狐裘綉襪紅錦袍琵琶合曲聲嘈嘈
房內陣傳羊羔雪花迴風如席飄捲簾醉臉殷若桃豈
知人間衣食如牛毛

題徐公懋棧樹下放鶴小像

丰姿濯濯三春柳文采飄飄五色雲未許仙家借騏驎
棧欄樹下候靈君

題劉德方經歷西村圖次察士安御史韻

門前石子路三叉正是西村第一家墻缺遠山青入屋
簷拗細柳綠藏鴉坐臨流水鰓垂釣行入幽畦學種瓜
我亦桃源隱居者何時對雨剪燈花

琦龍門邀王仲立品茶有詩見寄云踏雨過山來

喫茶瑛甚愛此句次韻以復

鷄籠峯下爾東家破曉寫詩邀品茶
秋風過樹落紅葉
夜雨滿溪流白沙浮缸蠟螳酒百斛
捧架牙籤書五車
嗟予有約不得去赤日畏途塵土遮

陳叔方寫竹一枝于春雪軒壁間龍閣賦詩于左

瑛次韻寫寄

結軒正合背鷄峯種竹哦詩也自工
月夜滿林疑朔雪
秋聲入戶是春風題名聊紀一時興
寫影當推八法功
若許扁舟徑相遇為君摘阮醉其中

寓居東郭風雨中辱王仲立叔正自山中遣奚奴

寄詩來和韻二首以復且招之過溪上時龍門

同在東郭

我愛君家好兄弟森々玉樹倚瓊林
揮毫對寫間居賦
促膝同歌梁甫吟牽牛蔓竹莖莖發
薜荔懸松箇箇陰
問得書軒何處是雞籠峯下澗之潄

我愛君家好兄弟同處讀書秋樹林
僕子囊書遠將至
道人把詩欣共吟十月清霜未為冷
一雨乍晴猶乍陰
幾日扁舟過婁上須到狀元溪水潄

學圃亭詩為蕭元泰真人賦

學圃丈人蕭神翁黃冠羽服山澤容曾候青牛瞻紫氣
佩劍隱入東蒙峯南尋玉書探禹穴鞭霆叱電騎蒼龍
紫皇一日授瓊簡命主海上蓬萊宮蓬萊宮中春日好
碧桃滿地春風掃呼龍白晝耕紫烟種得玉芝與瑤草
五月五日手自收七月七日仙人擣七成絳雪赤如丹
一服刀圭顏不老丈人玄圃誰築亭彩霞為幙雲為屏
亭中夜誦黃庭經羣仙弭節空中聽霓旌飄七衛九鳳
青都寄語遙丁寧賜以會稽外史號錫以翠羽流金鈴
我識丈人甫十歲示我琅函啓神秘飽讀山中石室書
碧琰丹章盡奇字謂我身中有仙骨晚歲相期供服事
大丹九轉今已成我獨胡為走塵世地肺采芝空避秦
武陵栽桃誰與隣青門種瓜誠小隱東籬對菊何其人
彼皆與世或未合逃名索已元非真何如丈人手種不
死藥不知人間甲子秋復春君不見朱仲李園三十六
歲收李子三千斛長安市上賣珠郎名在龜山九光錄

龍門與王仲立叔正同過草堂喜而賦詩

我別龍門強半月住在婁江之水湄客中見月動遐想

夢裏與君吟舊詩，歸來不得一餉樂。老去已成雙鬢絲，
秋林弟兄有高誼。扁舟到門如有期。

是日瑛自婁江方歸而羣公之舟同及門矣故賦
是詩也次琦龍門草堂清集

銀燭華堂生夜寒，深杯百罰起為歡。翠盤行鱠傳冰縷，
玉手分茶試月團。故友別如三月久，梅花折寄一枝看。
還山倘若疏蓮沼，好鑿龍門八節灘。

王仲立遊華藏賦詩見寄次韻以復

聞君同過玉峯西，盡日飲芳兼食菲。懷人心與暮雲合，
揮絃目送征鴻飛。淮西千里鳥絕粒，江南十月人無衣。
安得風塵淨六合，馬上競簫丞相歸。

次琦龍門遊馬鞍山詩

馬鞍山之山幽且佳，回岩疊嶽多僧家。雞鳴推窓看曉日，
海色爛熳開紅霞。人言茲山出美玉，一草一木皆英華。
石頭斲岩踞猛虎，藤蔓牽確纏長蛇。我昔春遊春日斜，
山僧携酒相邀遮。仙樂雲中降窈窕，天風松下吹袈裟。
嚮師石屋憇瀟酒，一離五色薔薇花。夜吹鉄笛廣公院，
聯詩石鼎烹新茶。君今好奇良可誇，躡雲着履追麋麇。

詩成大字寫絕壁，山靈衛護行人嗟。
歸來自駕白牛車，齊州九點元非遐。
下方盜賊聚如蟻，視之不啻恒河沙。

十一月二十七日霧中作

仲冬天氣暖如春，忽見梅花思遠人。
黑霧漫天吹作雨，黃沙落地散為塵。
長淮千里連烽火，西浙三年運米薪。
近報大軍屯六合，義丁日日點行頻。

次西齋聽雨韻

今年蟻月春未透，窓前老梅方始花。
孤燈靜夜同聽雨，短夢此時應到家。
佳節明朝是冬至，空江落日數羊華。
龍門歸去今成隱，肯寄活水來烹茶。

十一月三十日冬至

今年南至子月盡，宿霧不歛雲蒼涼。
愛日自添一線影，夜電忽開千丈光。
官府徵求苦到骨，村落餓享寒無裳。
近時南來持斧使，盡是各部尚書郎。

今年南至子月盡，北風回暖似秋涼。
誰拈絲筆書雲物，我愛瓊杯泛酒光。
盤舞小垂纖玉手，蹋歌一色縷金裳。
莫嗟青紫輕如芥，好屬從軍白面郎。

十二月初八日丞相自六合班師喜而有作呈秦

文仲秀才

百萬王師曉渡河，江南民力已無多。
鏡歌鼓吹軍前奏，渾脫蒲萄馬上馱。
唐室籌謀歸李靖，漢廷功業教蕭何。
書生亦欲觀文化，再拜天階看舞戈。

自題松下摘阮小像

山人愛著晉衣冠，手把月琴松下彈。
貌得形容在丘壑，只緣才薄不勝官。

蠲月廿四夜姚子章省椽見訪小集西軒瑛與秦

文仲聯句以紀

今年蠲月二十四，有客乘舸下江邨。
顧雪從荔挺見三

白，秦春到梅花露一痕。
靚女當筵分豆粥，顧癡兒出戶

看糶盆。他時相見玉山東，秦共說尊前語笑溫。
顧

用前韻和呈姚婁東

今年蠲月二十四，風景頗似石壕村。
斷岸雪消生草色，空江水落見冰痕。
兒童共喜交年節，燈火爭燒老瓦盆。
縣吏下鄉投府帖，相逢無暇說寒溫。

臘月二十六日夜可詩齋夜集聯句時在座者于

彥成、袁子英、秦文仲、張大本、顧瑛也。

今夕迺何夕，歲律已云暮。更長燈燭明，顧夜冷冰雪。返
膝六巧薦瑞，于封娘怒相妬，簪盞各盡驩。秦杯行不知
數肉，臺春筍織。袁法曲冰弦度，紅淚泣風蠟。張翠烟積
香霧，鼎沸雀舌烹。顧酒馮龍頭，注伊嚶轉鶯喉。于滿珊
溺，鷲步燕譙落語，弄秦馳驅，慨行路計窮，首授首。袁車
墜，費珠履風塵暗，城郭。張稼穡聲場圃，憂傾漆室葵。顧
啖分嬾殘芋，天王狩河陽。秦奸臣拒官渡，濟時風雲會
于曠世龍虎遇，前席宣室徵。袁下詔輪臺布，凱奏枋杜
詩，張諫諷校獵賦，干羽舞兩階。顧歌謠誇五袴，時清仰
皇澤。秦會少憶良晤，春水破微甲。于夜月照寒素，雲間
鶴鳴陸。袁吳下書堆顧，疲袁驛似戟，短于腹如瓠。張也

鄉曲英，顧秦亦廊廟具，孔問郊子官。張杜賞已公，句睽
違念契，閣秦茗芋寫情愔，丹心嘆駒馳。袁營心笑蚊聚
浮生草栖塵，于虛名日晞露，嗟彼尊咎徒。顧有此和樂
孺，用繼石鼎聯，聊以寓所寓。秦

右二十八韻是日懷陸良貴郊九成琦元璞也

題徐公憲載雪舟

山陰道上剡溪頭，夜半失却王子猷。梅花笑人不相見

至今修竹風颺。海虞徐卿隱者流。以蒲作帆。桂作舟。
浩歌招隱。疊々不絕口。迺以載雪。大書標舵樓。船中何
所有。圖畫在左。書在右。船頭何所有。三尺鯉魚。千斛酒。
客至漁童擊楫歌。船尾樵青舞。垂手或時浮琴川。或時
泛笠澤。不是浮家并浮宅。一朝大雪。夜填門。忽憶阿雪
白。中夜揚鈴曉到家。膝下稱觴壽羣客。一朝雪花大一
圍。東郭有人御弊衣。自披鶴氅上船去。日暮與之同載
歸。徐卿徐卿孝義有如此。不數迴舟深夜裏。匡廬山人
作文書。卷端索我作歌書。卷尾我家玉山深。且逢山中
積雪暖。不消君家丈人離。山東結屋我亦倚。山西結巢
去年燭雪厚三尺。今年春雪一尺高。雪中咫尺不得會。
母乃石頭路滑難相邀。我今還君此卷。增太息。我欲借
君此舟。載雪同遊遨。

玉山璞稿 至正乙未

青玉案

彥成以他故去作此懷之

春寒惻、春陰薄。整半月春蕭索。旭日朝來升屋角。樹頭幽鳥對調新語。已罷。雙飛却。紅入花腮青入萼。盡不與花神約。可恨狂風空做惡。晚來一陣。晚來一陣。難道都吹落。

富春馮正卿其伯又古山父仁山結樓讀書名曰

來青古山登景定壬戌進士同張濡守獨松關
濡道公與弟驥戰死樓敵復重葺之以盡卷尾

二馮讀書樓百尺雷春山色開窓入文星絢爛照秋闈
劍氣崢嶸動寒碧長公死節獨松關有弟驥者同其難
忠視尚聞風雨夕馳突鉄馬撼獸環當時非無史官筆
國亂倉皇書不得於乎宗季豈乏人天啓真人開北極
樓之結構五十年次公重葺修其椽黃金市書增萬卷
樓前大樹清陰還我典鉄崖期亦久吹笛騎牛古城口
為君持酒問張濡問濡家有茲樓否

和郊九成從軍詩時二月予以守關婁上

洗甲東海水飲馬西江潮大風吹旗脚軍容愈飄姚戈
船背櫓迴月中橫短簫青袍富家兒解裹肌肉消囚俘
獻六府以用報明朝

和秦文仲所寄就東郊九成

三月江南春事晚西枝花木却芬菲燕尋舊壘歸華屋
魚趁新潮觸斷磯我亦自憐為客久君應不怪寄書稀
雲臺迂史如相問為說竊心欲奮飛

三月江南花事晚港上草色春欲迷勁弩射潮海水交

大旗翻風江日低。隊簇錦鞬塞永巷。行分絳蠲照通閨。
爭如婦去玉山裏。期子共躡青雲梯。

述懷

自笑閑身作散官。也隨小隊簇金鞍。江關月落烏啼早。
海市春深雨氣寒。殺賊有方多武備。賑飢豈意屬儒冠。
思家夜、勞清夢。幾日歸承菽水歡。

和寄洪碧海無東袁仲博岳季堅

見說呼龍種石田。今年瑶草勝常年。仙花秀挹三危露。
丹鼎香浮五色烟。洗觥澗邊邀月飲。拋書松下看雲眠。
汝陽逸史知無恙。閑看迂齋寫太玄。

代書寄岳季堅

忽驚使者下郊居。起鎮危城備擣虛。半夜海聲江截斷。
一春花事雨驅除。朝騎生馬趨公府。暮閱陰符校武書。
只有計籌迂博士。人來問我近何如。

徐公憲載酒來慰寫寄于外史

四月西郊初雨晴。飛花落絮兩冥冥。客中似我頭先白。
交際如君眼最青。江水又添南浦恨。草堂自愧北山靈。
徐卿載酒來相覓。見說清齋寫道經。

寫寄余方外

山陰道士紫雲裘，向荷携尊過我遊。豈謂干戈頻在眼，
更憐風雨又移舟。壚頭柳色猶牽恨，客裏萱花不解憂。
見說毘陵城下水，近來匯合大江流。

水軍謠

富家阿見美且都，紅絲絛縣金虎符。爭誇殺賊取銀盃，
鬪篋擲還納大夫。富家阿見如阿童，操舟出海投颶風。七星對襟卷簷帽，
賊中傳是水中龍。

喜聞命相詔至喜而有作

鸞詔翩然降帝旁，江南赤子尚荒荒。鄂城月照雌雄劍，
淮甸星馳赤白囊。已見排山驅海若，更須操矢射天狼。
太平有象崇文治，底用田家執戟郎。

謾成

三月江南春尚寒，花枝強半雨摧殘。通街不使新文鈔，
到處多添濫設官。虎士揮戈迴落日，海神躍馬障狂瀾。
畏途客重能相見，取醉高歌拔劍看。

張景思同守西關，蒙惠白鬣魚一尾，忽常呂二妓。

見過就留夜飲口占以記

閒居每羨鹿門龐，忽爾移文守海邦。
厭聽潮聲無夜雨，喜看春色帶晴江。
白魚受釣供三尺，翠羽穿花見一隻。
騎馬歸來佳客在，畫堂綠酒照銀缸。

和瞿惠夫即事二首

澤國清和四月天，不堪公事重留連。
受風燕子猶多語，向日葵花正取妍。
使者雨中乘驛至，王師海上枕戈眠。
腐儒不願黃金印，舊業猶存負郭田。

時事紛：若聚沙，自憐客裏度春華。
奸雄豈是池中物，狂妄真成井底蛙。
山色空江雲障斷，星芒垂野斗橫斜。
寸心憂國慚無補，兩鬢飛霜一半加。

予以闕官繫身七十日間草堂松菊積雨半荒馬

上口占一律

我守西閩七十日，朝朝騎馬入城行。
草堂積雨荒松菊，水國無花少燕鶯。
赤子弄兵連百里，雞人擊柝報嚴更。
安能鑄劍為農器，盡使閒田寸寸耕。

金屏曲

錦堂龜甲泥金屏，九枝蠟樹花熒熒。
四星當筵夜降靈。

軍裝官妓隻娉婷，歌轉嬌鶯舞輕燕。五十朱絲罵幽怨，
瑞玉深杯割花片。四月八日尊前歡，沉香火炙氍毹紅。
瑤聖水滴金銅龍，猿翁劍杖擊滅燭。蝴蝶交飛落寒玉，
碧烟綠霧迷冶客。花兔夜出闌昌宮，罌湯醉浴隻芙蓉。
牽雲曳雨留春風，墮珣遺珥鬼妻拾。向月呶叨白狐泣，
挂旗行去無跡。雄雞鴉呼日出。

花名中以弓矢受知大帥辟為親隨其所居曰孝
思筠室携卷求題為書二絕

花郎每憶奉親時，種竹當窻偏孝思。新笋今年密如簣，
竿上盡刻蓼莪詩。

挽強射的久知名，見賊身如快鶻輕。大府遴才居上選，
傾城盡說得花卿。

和許彥溫都事見寄

西郊草堂婁水上，夏木晝陰車馬喧。子為武官乏虎相，
我欲隱居無鹿門。陶令醉歸五柳宅，杜老愁憶浣花村。
守閔三月不得去，屋裏候賓欣有孫。

和卞室之靈慈宮對景有感

又向西郊揖馬鞭，相逢不飲亦凄然。登盤杏子紅於染，

出水鮎魚白更鮮。夜電引雷催雨至。海潮平岸帶江連。
客懷盡日無排遣。自向南窓類斷編。

軍維欽府椽雨中過草堂談宮詞樂府造語新麗
作詩以贈且期携紅牙者同至

夜雨高堂生乍涼。真珠美酒灑紅光。香凝龜甲屏風上。
水滴蓮花刻漏長。麗語盛傳今樂府。新詩多是晉文章。
如公案牘能閑暇。携取張家記曲娘。

無題

惜春長欲與春期。薄倖東君信有私。花粉護房蜂祝子。
芹泥葺壘燕巢兒。蜀娥恨織七成帳。吳女愁縑八繭絲。
不寄迴文机上錦。空將五色染相思。

望斷金鞍白鼻駒。兒家門戶鎖春華。牡丹紫拆初含蕊。
萱蕊紅酣半吐花。盼女樓中飛燕子。來婆街裏卜琵琶。
雕籠鸚鵡休饒舌。長是無人叫點茶。

黃四娘家竹過牆。日長愁斷九迴腸。靡蕪葉大思公子。
萱草花開憶漫郎。鬢撲金蟬垂鬋葉。帶銜玉燕動丁當。
自將團扇隨蝴蝶。要打雙飛一道香。

石城女子唱迴波。唱入迴風思轉多。腸斷紫鴛分破鏡。

淚拋紅豆濕羅靴。東遊洛水思甄后。西望巫山憶楚娥。
五色柔情絲萬縷。夢魂長繫海棠窩。

于彥成為山陰之行賦此以別

端陽明日是遺恨在懷。沙客裏非無酒尊前不見花。受
風憐舞燕得雨哭鳴蛙。只憶山陰各孤帆去路賒。

予逃名于吳淞江時于彥成將歸越上舟中有懷
肯將身事逐飄蓬。鬻爵何緣到野翁。老去滔滔嗟逝水
慈來吐吐坐書空。一窻夜色長江裏。十里雨散清夢中。
更憶會稽于外史。行厨還在讓亭東。

舟中寄婁東諸友

憶昨西郊嘆別離。扁舟便向雨中移。行窮江水一百里
卧盡風波十二時。到處好山皆可畫。近來新事不如棋。
殷勤寄語婁東友。歸日草堂重賦詩。

乙未書實和孟天暉都司見寄

江頭日。惜芳時。三月春光兩鬢絲。拔劍自歌還自舞。
邑人誰識虎頭癡。

治安無策濟時艱。始信金消壯士顏。恠底颶風翻漲海。
浪頭一直過狼山。

獵、東風吹火旗水軍三萬盡精肥一春殺賊知多少
箇、身穿戰血衣

婁上人家不識春蒼頭蛛網亦生塵朱門桃李皆零落
只有東風未嫁人

隔屋征人^去歸不歸朝、思婦泣春菲大堤芳草連天長
莫信啼鶻怨落暉

海口潮聲挾雨來西風一陣却吹迴書生此日愁如洗
斫地高歌是莫哀

聞道君王日早參每虛前席問江南何人醫國如秦緩
有客能棋似李慙

盡說樓船水戰鏖西風烈火張天高一從赤壁爭雄後
千載功名只騎曹

大戶今年無老米細民近日有新錢街衢寂、無車馬
風景淒、似禁烟

梅雨今年多去年青秧白水漫平田端陽過了南風起
不見誰開漕運船

送方行已往松江叅臻雲谷和尚

阿師法號、行已百里搖船弄新水玉山正月春始寒

不放風光到堯李桃李花開未成一月都無五日晴
忽然而來遽然別把酒對春無限情無限情在何處細
雨蒼苔石頭路張帆又向雲間水行草青：飛白鷺雲
間古寺金銀開中有黃金獅子臺老禪宴坐揮玉麈談
空說有教如雷阿師今年終二十慧性豁開非面壁可
翁弟子數十人眼見阿師先入室僧中云是支道林况
復好詩仍好琴詩以繼風人之大雅琴以寫古人之素
心我欲留師十日任師竟掉過頭不迴體揮絃興逐孤鴻
飛囊詩脚踏春潮去暮節還矯首相思雲樹間老我相
從修淨土鑿沼種蓮歸故山

舟泊山塘雨中口號

海賊初退山賊連姑胥細民如倒懸只憂疫起在五月
豈意雨多如去集山光依微弄野靄水色慘澹凝愁烟
城中交鈔糶官米城外鼓鼗催庫田

乙未五月口號

二月修城五月過修城不了柰城何只因一夜斜風雨
到曉都坍一半多

農家祈社種良田盡卜今年勝去年抱布貿袂都挿遍

開門一夜水連天

成隊誰家青苧娘頭遮箬笠足如霜入城糴米不歸去
屋裏踏車人正忙

雨中賣魚無買米沿村打鼓傍解秤二斤十貫新文鈔
只直倉黃米四升

堤頭放馬是何人兩三三三轉作羣強把新錢買村酒
口稱曾去做苗軍

長歌寄孟天暉都事

憶昔春風吹少年繡衣騎馬珊瑚鞭錦堂絲管逢落日
青樓鶯燕迷花烟即今未老嗟當日坐卧使人倦行立
太平天下起干戈從此百憂如蠅集大兒服勤欲養親
儼卜草堂聊遠塵前年天子賜金虎命長千夫防海濱
百里離居將二載我復治生給不逮郭外薄田力作耕
原上柔桑訓奴採二親頭白笑語溫次兒行酒婿應門
有弟隔屋罕相見我婦日牽齧亂孫天子仁慈尚姑息
丞相南征興重役乘時餓虎晝喫人誰與蒼生繫休戚
民力不堪供奉承董責盡用尚書丞新行交鈔愈澁滯
米價十千酬四升師出無功天子怒一朝遠放西河去

班師下詔慰黎元四海歌謠滿途路今年頑民起西山
怕首舉火燒閭閻城中六官奮六節凱歌馬上擒俘還
是時海寇集江下水軍殺之海為顛元戎不識予何人
起作區、守閔者閔守三月不得歸豈假威權屬布衣
自謂一身本無事又俾審理民間飢補官使者招入粟
一紙白麻三萬斛頻年官糴廩為空數月舉家朝食粥
時維五月梅_雨花多眼見青田生白波飢農仰天哭無食
今秋無成將奈何吳江漫上風波急夜迤扁舟及家室
坐看急電怒驅雷驟雨打窓愁欲泣我歌長歌行路難
聞者撫膺坐長嘆皇天流毒虐下民自此天下何由安
嗚呼自此天下何由安

陳敬初詩未問訊次韻以復

我別故人陳太丘住在婁江之上頭南風吹海大魚出
西日射地連山浮守閔三月騎官馬聽雨十日對漁舟
緬憶行春共行樂如此好懷成夢遊

寄題桃溪吳浩然平遠樓

飛樓高立桃花溪、上碧桃花滿蹊天邊湖水開簾入
雲外山巒到檻齊每見神龍挾子過曾聞靈媪向人啼

何時一舸當門繫，醉依闌干取次題。

次韻吳東澗見貽

龍門盛說吳東澗，投老心閑能好詩。燕賓每出蕉葉鱗，
教子自唱柳枝詞。山光隔野蕩晴靄，水氣入林生碧滋。
我亦桃源隱居者，百里悠悠勞遠思。

次龍門韻寄杪擺室公孤月上人

曾向虎丘兼月住，雪滿連山萬松樹。于時始識公上人，
日、相邀勞治具。夜來有夢過僧房，茶煮劍池春水香。
杪擺一樹花盡發，覺來鼻觀生清涼。今日龍門俄至此，
邀我置身岩壑裏，寄問東林遠法師。着得武陵陶處士，
○八月十日與龍門飲于西樓口占一律以似。

徙倚溪樓上，西風欲暮天。亂雲依樹出，落日向江懸。驛
斷南來騎，潮催北去船。相逢誠不易，對酒話當年。

題柯敬仲畫梅花竹枝

死別丹丘老，于今二十年。似看顏色在，因有畫圖傳。庾
嶺一枝雪，淇園數葉烟。令人春雨裏，相對泣婵娟。

韋德珪携詩見訪次韻以復

冠儒自笑不封侯，猶向山中氣食牛。未見李邕思識面。

若逢東野合低頭，新詩爛寫泥金紙。美酒深傾葉玉卮，
安得相逢王子晉。月明星鶴過丹丘。

聽雨二絕

涼風颯々下，遮鼻落盡梧桐雨。未消只道秋涼無着處，
元來多半在芭蕉。
生憎秋暑不肯退，入夜飛蚊猶更多。不是涼風吹雨急，
終宵無復柰渠何。

秋興二絕

短檠照夢獨閑情，七月江南尚甲兵。此夜書生愁裏聽，
秋風秋雨盡軍聲。

草堂秋靜絕埃塵，日夕門迎車馬賓。獨嘆^中遮^中雙^中杏^中樹^中今^中
年無子惠比鄰。

和繆叔正見寄就柬秦文仲

八月新涼入袂衣，阿郎騎馬到門稀。山中有客論秋水，
江上誰家歌采薇。野鶴步月作人立，木葉受風如鳥飛。
寄訊勘書秦太史，木犀花開猶未歸。

次姜羽儀韻二首

落葉滿林啼亂鴉，不堪何處起哀笳。忽於半夜驚時序，

又近中秋看月華。射石楚生空訝虎。縣弓廣客獨疑蛇。
何時得似青門隱。十畝山田盡種瓜。

草堂八月暑氣微。竹裏哦詩晝掩扉。過雨秋花如我瘦。
未霜溪鱗為人肥。長教肘後黃金印。不到山中白苧衣。
正爾西風動愁思。又驚飢雁渡江飛。

鄭君舉府椽分幕西關次韻以寄

掾郎自愛西郊幽。大旗卓地臨清流。坐占柳陰臨晉帽。
行穿花裏佩吳鉤。橫梁賦詩我所愛。擊柝抱關誰與儔。
何當案牘假餘暇。同載玉山佳處遊。

次君舉西郊即事

西枝之村不數里。扶醉典君清夜遊。三更落月照官舍。
八月涼風吹客舟。蒹葭蒼白始受露。絡緯軋白尚專秋。
兵戈在眼不肯退。安得置身同一丘。

蔡山人隱居

蔡家隱居絕蕭爽。鑿塹引水環幽深。當門十里荻花浦。
繞屋一林斑竹陰。維艇正看黃葉落。開尊時對白鷗斟。
畏途別去罕得見。且醉西風傾素心。

題袁仲長仙史綠筠軒

仙家住 在簞籬谷 箇口琅玕護 石扉委佩靜 聞蒼雪落
梳頭閑看綠雲飛 月中王子吹笙過 林下壺公策杖歸
若許迂踈逗相造 為君携取四絃揮

題劉商觀奕圖

四老松根角兩碁 野人如鶴立多時 箇中便是商山樂
世上剛傳石室竒 一奴向教遲黑子 千年何用刻銀絲
老坡好事能題識 永配蘭亭玉枕碑

題袁外史德潤堂

君子有令德 于焉潤其身 况彼學仙者 逍遙岩壑春
華宇構層阿 稽首延玉宸 綠窓生紫烟 珠樹散芳塵
道藏五千卷 進業維日新 味玄葆冲和 養素全天真
願言崇靈澤 永流後人

計籌牡丹丘真人以雜詩卷俾岳季堅來草堂索

詩就次卷中甘允從三絕

欲向丹丘借白雲 瑤壇稽首玉晨君 只愁俗眼無多办
不識琅函石室文

聞道通玄似祖洲 羣仙於此盡遲留 剛風不到天根上
夜：丹光五色流

紫雲閣下紫雲橫，瓊秀亭前壁月明。欲借芝田雙鶴子，
來聽仙史醉吹笙。

題石魚為牡丹丘真人賦

仙人有靈玉，渾然神鯉形。曾作大鯨吼，振鬣徙南溟。
石魚元高侯，彥敬得之徑尺而鱗鬣。口目具為侯遺南
谷杜真人，真人仙去為月溪。王真人持去月溪羽化復
為杜丹丘歸之。

和荅呂養浩

搏虎南山膽氣雄，男兒壯志本來同。却將短卷描蒲女，
又把新詩寄敬中。夜月浙江何日渡，秋風淮甸幾時通。
要當挾策見天子，共看扶桑曉樹空。

就次韻荅諸葛用中

鄂城遙識劔雌雄，自古相知博物同。向見袁安來舍下，
始知諸葛隱隆中。林泉竹裏詩曾賦，舟楫桃源路可通。
殺敵豈能無猛將，逢人莫問楚王宮。

中秋寓盤閔適諸葛用中知士林秦文仲龍門子

英同會就留賞月分賦蓬字

中秋又在客邊逢，莫嘆流光轉斷蓬。老子固當清興發，
故人相見好懷同。酒涵大地山河影，身置廣寒宮闕中。

明日更期維白舫、共扶殘醉倒詩筒。

題唐人牽馬圖

舞馬誰牽下木床、絳纓初解玉丁當、梨園莫唱傾杯樂、
錯把春風屬八坊。

題三生圖

三生石上舊因緣、也是山僧也是仙、記得分明都不說、
從他月照葛洪川。

題相馬圖

神駿從來不受羈、僧中只有道林師、若教腳迹踏天下、
後代何緣得馬兒。

君臣同慶樂送脫因萬戶

唐樂志君臣同慶樂一曲、身觀中蘇定方執賀魯李
勣平高麗獻馘奏凱四曲之一也、其詞曰主聖開昌
歷臣忠奉大猷、君看偃草後、便是太平秋、瑛三復是
章不勝撫膺方、今四野多壘、海波橫流、黎昨苦于誅
求國賦、艱于餼運、而聖天子端居九重、累下寬詔、以
慰元元之望、又選樞密院斷事官脫因公為漕侯、以
理海運、公盡勞王事三年、吳米畢達京邑、至正乙未

春賊起新豐，踰楓橋抵閭閻。將入城，肆殺掠，公不以
有司之事為彼任，首決大議，率眾殺賊，以全吳城。豈
非奉大敵為聖天子佐昌曆者也。以公之才之忠，設
聖天子命之誅羣惡，則太平之秋可待。瑛謹葺長短
句，引其意，使吳民歌以報公之德。固不在下士
鄙語美之然，欲希公之聽，庶知婁東野人亦知公之
萬一云。

盛哉世祖馬上開皇封，鉄馬蹴踏萬國空。奉琛獻璧被
聖化，黑海之水直與銀河通。百年禮樂武備弛，生民有
眼不識戈與弓。迩來花山豎兒起，微曩延蔓長淮千里。
帕首多如蟻，巨鯨吞舟波浪白。落日壓山旗幟紅，城非
不高官不守。所至赤子戰，為沙虫。江南供需民力竭，
家上喬木生秋風。兵興之際，天子之憂海運，所以遴官
理漕，御筆大書除我公。才磊落固是匡贊具，况復讀
書有志文武充。推心置人，亦樂為用。不以細故芥蒂
于其胸，三年東吳稻米抵都邑。丹宸一一標全功，今之
人食君之祿，不能為君盡大節。臨難畏避，憂冲國之
重事，天下繫，豈可責分彼已，不得竭效。臣子忠且如今

年春盜賊起新豐四更急撞關聚謀舉火攻議者狐疑
計莫出公曰此賊已墮吾掌中矐目拔劍斫長索有違
令者當典此案同議兵一千人袒臂如雲從軍鼓如雷
震關出橫鉞自主天箭衝日炙龍花上金甲猩紅纓拂
胡青驄手挽強弓發猛矢射殺西山獲白熊野天秋高
蒼隼健凌鞞狐兔無潛蹤縛俘載馘振旅入城去短箫
奏凱擊鼓聲鏦々城中居民比屋四十萬長街廣巷羅
拜父老婦女兒與童咸言受活無以報兩手加額頌公
五福全而崇及黜發粟漢廷實元老毛遂軟血戰國推
談宗如公者總二子之才斷豈非聖元國孕之所鍾誰
能排雲叫九重有臣如此天子何不召入明光宮大啓
元戎十百乘授以斧鉞出以誅羣亮坐見功成舞干報
天子邦基式固河山雄婁東野人拜手重稽首期公致
君堯舜勲業齊夔龍謹歌君臣同慶樂千秋萬歲永
傳無窮

題雲山圖有感

樹密嵐光薄山空雨氣酣阿誰亭子上對坐說江南

題子昂畫楚江春晚

東方旭日出曛曛照見巴江曲似不莫遣猿猱到巫峽
山頭猶有楚王宮

雪姑吟題朱澤民所畫雪姑鳥

雪姑鸚鵡洲邊住自小無心事机杼一身悔嫁白頭翁
日日孤栖不知處立傍溪頭楊柳枝春風鴉舅欲相依
不聽杜鵑好言語勸姑在外不如歸姑不見韓朋樹上
相思雀隻宿隻歸隻飲啄

○天寶宮詞十二首以寓所感

天寶鷄坊寵賈昌不教蝴蝶上釵梁錦裯晝浴天驕子
絳節朝看王大娘芍藥金欄開內苑蒲萄玉觥酌西涼
月支十萬贖脂粉獨有三姨素面粧

○五家第宅近天家侍女都封繫臂紗池上桃開銷恨樹
合中香進助情花風迴輦道鸞鈴遠日射龍顏雉扇斜
韓虢並騎官廐馬醉挽丞相踏堤沙

○蓮花池畔暑風涼玉竹迴文寶篋光貪倚畫屏巢翡翠
誤開金鎖放鴛鴦輕綃披霧誇新浴墮髻款雲銜晚粧
咲指牛女私語處長生殿下月中央

○五色卿雲護帝城春風無處不關情小花靜院偷吹笛

淡月間房背合筆鳳爪擘柑封細合龍頭瀉酒下瑤盃
後宮學做金錢會香水蘭盆浴化生

○龍旂孔蓋擁鸞幢步輦追隨幸曲江鳥道正通天上路
羊車直到竹間窓桃花柳葉元無恨燕子鷓鴣兒各有隻
中貴向人言近裏風流陣裏帝先降

○祕閣香殘日影後燈分青玉刻盤螭琵琶鳳結紅文木
弦索蚕縲綠水絲金屋有花頻賭灑玉枰無子不彈碁
傳宣趣發明馳使南海今年進荔枝

○近臣諧謔似枚臯侍宴承恩得錦袍扇賜方空描蛺蝶
局看隻陸賭櫻桃翰林醉進清平調光祿新呈玉色醪
密奏君王好將息昨朝馬上打圍勞

○虢國來朝不動塵障泥一色綉麒麟朱衣小隊高呼道
粉筆新圖徧寫真寶雀玉蟬簪翠鬢銀鵝金鳳踏文茵
一從羯鼓催春後不信司花別有神

○十三女子擘瑩篔篹選作梨園第一流却道荷花真解語
豈知萱草本忘憂紅鸞不照深宮命翠鳳常看破鏡羞
舞得太平併萬歲五年誰賜錦纏頭

○五王馬上打毬歸羸得宮花獻貴妃樂起閣門邊奏少

禍目臺寺諫書稀○侍見隨幸皆頌紫○散子蒙恩亦賜緋○
姊妹相從習歌舞○何人能製柘黃衣○

○新製霓裳按舞腰○
○金鳳斜飛上步搖○
○只○因○野○鹿○銜○花○去○從○此○君○王○罷○早○就○

○宮衣窄○小黃門○躑躅初開賜繚盆○夜月不窺鸚鵡家○
春風每憶鳳皇園○愛收花霧消心渴○怕解金阿見爪痕○
只有椒房老宮監○白頭一一話開元○

題姪良用臨趙魏公霜浦漁舟圖

曉霜靜落蘆花裏○漁父挈舟弄茗水○
○夾浦亂山青似洗○翰林是時始歸老○最愛漚波亭子好○
○坐窓援筆寫江南○一段秋光落揮掃○不知傳世今幾年○
○百金酬直不棄捐○虎子猶子亦癡絕○
○前年之官去東浙○作贄殷勤贈云別○為將老眼細摩挲○
○頗似唐人臨晉帖○
○蘭亭贗本永寶世○藏護不減囊中珍○
○客有龍門遠相訪○共披此卷遣閒情○
○嗟今南北皆干戈○清風日少紅塵多○
○磨穿鉄研不得志○

拔劍斫地空高歌，何似長竿在吾手。多向船頭載新酒，
寄謝故人顏太師。莫向烟波尋釣竇。

題韓熙載縱樂圖

文公避難肆荒淫，買妓朝朝散俸金。客有舒生能按節，
如何不畫獨絃琴。

金粟影亭懷于彥成五十韻

八月玉山上，桂花千樹黃。或依松下石，多亞竹邊岡。葉
帶寒烟重，陰連宿霧張。踈葩跼裏見，小葢萼中藏。偃蹇
當危檻，娑娑覆短牆。畫闌縣瘦影，金粟散幽香。皓魄穿
虛幌，樛枝倚曲塘。臨流清可愛，著雨濕何妨。丹鷓排雲
下，青鸞照鏡翔。薰衣欺甲煎，點額妬官粧。得子元無種，
移根自有方。雖然亭側畔，宛在水中央。徙倚成吟久，攀
援引興長。未能招隱士，先約探花郎。仙掌杯承露，君門
策擅場。虎頭傳綵筆，鳳背按霓裳。色映鸞兒酒，名高荔
子漿。贈詩誇竇氏，運斧笑吳剛。鼻觀閩山谷，神遊狎上
皇。葢珠仙子降，瑤玉佩敲鐙。非獨延秋色，尤兼耿夜光。
素蟾飡玉屑，白兔搗玄霜。既入維摩室，寧無般若湯。喜
逢越清澈，愁憶賀知章。岳亦居盤谷，陸今留太倉。雖謀

茲夕醉却想昔年狂夜月華堂裏秋風錦瑟像曾于青
步障呼下榻謠娘按曲歌桃扇圍棋勝紫囊芙蓉連蒂
葦橋子並頭膏弋鳥驚逢鷺罾魚喜得魴鰈媵行鑿落
絃索奏鴛鴦翠袖擎灯燭銀鈎馬樂章閣談矜漢語嫚
罵據胡床屢舞袁千里聯詩頗辟疆至今猶想像此際
謂尋常俯仰經三載干戈滿四荒名慙徵士起職愧守
闕忙接境無鷄犬當途正虎狼何期雲出岫竟逐鴈隨
陽世事憐多變人情慨可傷睽違誠草草音問太茫茫
去日應愁暑今朝已喜涼轉頭誠久別矯首獨相望越
上秋方好岩頭樹亦芳猶聞留鑑曲未報渡錢唐晞髮
當天姥題詩寄草堂身栖衆香國夢繞百花庄適意多
行樂歸期久相忘灤西亭子好幾日促輕裝

○ 至正乙未十月廿六日讀書舍會合聯句

王歷十五載陽月廿六夜嚴節增淒厲顧暮晷易推謝
宿莽委中園袁鷲焱納虛櫺集鳳萃時疫恢鳴騶駐華
駕襟分念契濶盧簪盍樂休假綉錦詩在囊頌籤軸書
細架咳吭宵警清袁宿羽風散乍霜階殞葉積恢露石
法花亞明星光粲燈盧溜雨寒落醜吳婦給膳庖頌命

童肅迎迓破橘香在枝袁罾魚水回以贈飛雪縷盤恢
酒灑霞沐單奏馮牙拍節盧樂度冰絲借吳風語柔麗
願 芝雲秀嬌娃春喉弄鳴鴛袁塵鞮舞飛鷓炭呀朱火
獸 恢香歆博山麝煮茶龍頭鑄盧噉肉牛心炙甲銘房
剗粟願叨渴漿沃蔗躋時歎合并袁深情勞樹藉憂葵
終念魯恢逐鹿殊爭伯群妖樹白挺盧黔首怕紅鬃流
馬曉渡廬願細柳夜屯灞一戈魯陽揮袁三箭天山射
跳躍突精騎恢彎 控強犯斬馘刃剗羊盧毆毒火焚
蟻威散淮蔡功願佳氣春陵借降納慎撫綏袁違傲母
貸赦獻凱捷書旌恢班師令旂馮銘鼎會勒勳盧賜金
椰各價色絲組雲宸願鍊石補天罅事國宜盡瘁袁奮
身不遑暇終期帝業隆恢喜見綸言下苗格階舜干盧
夷貢布輸恡明時歌再康願此日酒頻賞詩弭序毛齒
袁觴令咲机獲醑酌玉山頽恢傾倒懸河瀉行哢阮籍
途 盧耕學樊遲稼聯次石鼎句願咏紀讀書舍雪蘄筆
絢花袁銅盤燭燒樺駒隙恣窮險恢蟲聚散炎夏願得
解甲兵盧庶以事桑柘永齊白首民願擊壤頌元化願
至正乙未十月九日玉山中玉毬花開飲酒花下

時琴川妓秀雲在焉

十月兵戈未肯休，為將綠酒滌煩憂。
美人笑解金條脫，獨樹花開玉綉毬。
冷艷尚含春雨露，閒情猶帶舊風流。
喚回蝴蝶團香夢，睡隔梧桐落葉秋。
化力豈教司后土，樂聲底用打涼州。
厨中儘有逡巡酒，勝賞何妨日口留。

寄張彥弘進士

聞道風流張聘君，俊才絕似鮑參軍。
玉壺滿貯三危露，丹鳳高鶩五彩雲。
咲倚月中金粟樹，醉招花下石榴裙。
幾時同下秦廷榻，剪燭聯詩坐夜分。

送韋伯圭教諭富陽

古城玄聖宅，正在富陽山水落。
魚梁出峯迴鳥道，環先生施教去。
弟子讀書還應過嚴陵廟，看碑拂蘇斑。

漫成

未知曾解太平園，獨嘆時光在眼非。
黑海水寒魚到火，玉關風急雁來稀。
軍中盡說廉頗老，時裏新傳趙孝肥。
愁見嚴霜落紅葉，行人何處寄征衣。

送王叔正贅親

新婚王郎寔我第，闔闔世家金葉儒。
種玉求妻知雍伯，

乘龍作脣見淳于兔絲女蘿附修竹翠寫青鳥集高梧
何以贈之九子墨更祝少君勤事姑

乙未冬至口號

乙未南至節候好晴日暖風如早春既占雲物卜來歲
又見梅花喜似人寒溫叙語拜孫子綵服稱觴娛老親
只憐舍弟不在眼更憶大郎鏖戰塵

○安別駕殺賊紀實歌

至正十五年冬十一月廿六日崑山之石浦村有賊
黨殺土豪胡氏父子及孫火其屋掠其妻女財物巢
于村之無相寺將有助逆之意州尹于闐彥暉公外
示以安至次月廿三日假以他事詣訴于郡：官聞
于分省叅政公以本郡治中安公行勅代事公即率
親隨精兵快馬散言發常熟乃啣枚夜至真義里分
符俾瑛與陳志學各選水軍協力剿捕時廿四日夜
廿五日早過江令集千墩寺寺之去無相寺廿里州
尹率水軍自此西進義士張漢傑奇領各募義丁分
把去路治中公自江北浮馬直入賊巢擒焚寺令軍
而回是夜已半此行也計官軍五百水軍六百民之

袒肩者千有二百人往返者再宿生擒首賊二十有
六殺死焚殺者無算脅從者貸之得米若干石銀若
干錢他物稱是寔用兵神速之力也瑛忝從軍幕中
謹歌長歌一章以紀其事且美治中公能奮勇效忠
報國也歌曰

君不聞趙雲開關下長坂蜀主謂之一身膽又不聞李
廣衝敵勇冠羣虜中號曰飛將軍二千年間幾人亞復
見西河安別駕今年二十六燕頤虎頭目如畫春來殺
賊西關關手中寶刀龍爵鏢勝下一足雪色馬滿身血
濺桃花斑吳淞江南歲將莫有賊殺人團黨聚心期絳
帕接刀兵日費黃金置旗鼓州尹慮久剪除難中藏長
策外示安曉張大榜諭渠首夜袖飛章聞郡官別駕因
之白叅政授以兵符口傳令帳前五百綉衣人疾走啣
枚涉泥濘草堂擊柝報二更軍吏扣門提水兵揀精揮
勇得三百戈船踏櫓隨朝行遲明下令千墩集最喜打
頭風雨急二十四馬渡長江直搗賊巢擒賊出手擊步
挾馬上馱髯胡擊笛烏烏歌歸來火光燭天地卸甲共
傾金巨羅鉦鼓遙々入城去父老歡迎滿途路具慶堂

中散賜金父候兒歸兒拜父百年一門絕代無父領太尉兼大夫眼前有子乃如此將相獲全忠孝俱今年大家盡無米小家嗷：食糠粃水田百里生白波蔓草不除春不已經濟政在艱難時花卿姓名齟齬知勿謂一身自年少繫此大郡之安危兵家行兵貴料敵重地無人戒深入王剪伐荆六十萬司馬擒孟絕八日西河別駕真英林貂蟬定向兜鍪來一心成功報天子天子已築高心墓書生從軍居幕下粉面聊為萬一謝作歌更紀殺賊時乙未季冬廿五夜

崑山知州坊侯平賊詩

美哉太守于闐氏自是明朝瑚璉器朱藩皂蓋來是邦正值兵戈分擾際東鄉頻海賊已殘西鄉平地翻波瀾家心門戶鎖蛛網征需百出無時安蒞政黃堂十二日亭長馳書如雨急江南賊起夜殺人虜妾攘妻火廬室心古寺深且幽白晝縱飲群聚麀寶刀傳令割白馬銅盤軟血槌烏牛心報言濟江過江北守也聞之不形色于時絳帕接近郊縱有官軍擒來得披衣曉登江上舟心獲童擊楫歌中流詣巢微服語慨切責以大義安其首

口吐胸中治安策，叩頭拜受銅虎符。
分得帳前軍五百，西河別駕來主軍。快馬馳突夜躡雲，
雕弓三隻翠羽箭。繡袍五色龍花文，分令嚼枚渡江水。
三千義軍同日起，軍容斬不可當。首尾大蛇行十里，
大旗獵獵翻朔風。血染吳淞江水紅，殺氣滿天化為霧。
牽雲帶雨寒迷濛，秋風蕭瑟鬼銜冤。哭砲石飛聲撼坤軸，
黃髮碧眼老毡毼。手挾生俘生啖肉，火炎樓閣十丈高。
奮火衝擊氣愈豪，快鶻一舉不回顧。窘鬼三窟何由逃，
逢此鼓打回軍樂。箇箇渠魁馬前縛，檀房夜坐紅氍毹。
美酒千杯金鑿落，我守審錄明如神。有罪不及註，誤人
向非不戒造惡者。九泉抱恨何由伸，是行用兵最神速。
餘子高談空碌碌，計程數百倍道行。往返都來渾信宿，
中原處處無完城。江南日見青草生，土官如守報天子。
四野豎兒何足平，書生從軍亦何補。但願執鞭安此土，
既看劍斬長橋蛟。更須矢射南山虎，只今郡官皆大材。
六叅分省堂上開，要當努力盡撫事。十載龔黃今復來，
君不見北來丞相坐南脊。便宜除官至三品，考功端合
陞上階。不待飛章九重請。

岳季堅自計籌來飲于雪巢口占二絕

江上北風初厲寒，雪巢賓客話團圓。
花開一箇枇杷樹，明日持盃做雪看。

江上北風未成冷，雪巢無雪柰冬何。
老子若來遲半月，定看雪似去年多。

次王仲立歲夜見寄口號

澤國江空歲宴天，人家雪沒斷炊烟。
田田白水深三尺，未卜新年勝舊年。

寄城南彈箏美人

裊裊娉娉十五時，雙鬟低躲綠雲垂。
桃花貪結春風子，錯恨當年杜牧之。

銀甲彈箏玳瑁筵，新聲翻在十三絃。
絲雲忽逐梨雲去，夢隔梅花月子圓。

曾將螺子染金篦，為補春山八字眉。
最是橫波流太急，不容舟楫渡江遲。

雪作肌膚玉作神，黃金幾欲買青春。
只回變却龜兒卦，到底東風錯嫁人。

送韋道寧閩憲奏差

閩中第一東南會、海市環山聚舶商。五月炎風開茉莉，
三州瘴雨濕檳榔。行人日：隨驄馬、悍吏時：避繡裳。
見說石門堪隱世，羽書不到止戈堂。

送姚以善陞浙東帥闡

漕府服勞陞帥闡，臨岐送別更題詩。兵戈尚爾連千里，
鞍馬毋煩事四馳。城上風高聽刁斗，海邊日出見旌旗。
虎頭猶子如相見，說我于今老更癡。

題趙子昂畫琅玕竹

我有一足撫州紙，愛之不減鵝溪絹。學士放筆作直幹，
此君如玉多清標。梁王宅裏月皎々，山間池上秋瀟々。
腸斷江南鐵鈞鎖，鳳鳥不來今寂寥。

題春勝遊圖

憶昔醉看天平山，龍門日炙春爛斑。茶煮白雲亭子間，
頻年甲兵蔓南北。未卜此身能再閒。

送周天蟾

▲天蟾子布衣，儒家在金陵。市上居，年方十五習孫吳。
▲二十作賦擬三都，揣摩讀成不下蘇。猿臂豹頭七尺
▲軀，膂力絕人世。所無擊劍慣騎生馬駒，結客况結專。

設諸、手提錢杖、歷方輿、道逢異人、毛莫如、口受皇極、玄
玄書、摩盪動靜、皆潛虛、豁然一悟、忠義俱、不向侯門、曳
長裾、誓與天子守皇都、至正壬辰、秋月初、紅巾寇抗、數
萬餘、斬關據嶺、袒臂呼、大叅董侯、奉虎符、延君幕下、叅
軍謨、布以長陣、緣平途、乃張左翼、伏右肱、君居中、軍三
擊、桴黃旗、赤幟紛、前驅傾巢、擣穴擒、其係徑、歸田里、耕
而鋤、浙垣校功、奏王除、不曰弓旌、駟馬車、皇使、者來
草廬、水軍開府、東海隅、大帥待君、猶鳳雛、江左未必、無
夷吾、試君新翻、水戰圖、丈夫抱才、不設攄、徒令後世、空
嗟吁、春江花開、當酒壚、上頭酒價、如玳珠、為君豈、惜滿
眼醜、手折楊柳、歌吳歎、作詩送君、語非諛、不信問之、秦
太迂、

去年秋九月天蟾先生過予草堂偶談及水軍事余
謂水戰之法甚難蓋舟楫有遲速風水有逆順故不
能齊其隊伍先生自言近以八陣圖法翻製水戰陣
圖一十有八予以見軍長千夫領寧海所事或有所
用求之未獲示誨今先生以大帥之招復至海上聞
下榻泮宮遂往見之而先生又御風西遊矣陳性之

訓導出贈行冊求予詩其出處隱顯文仲秦先生已
序之予復何言重違其意為長短一草以歌之文仲
性嗜書有書迂婁江人稱為太迂先生云今年夏至
正乙未后正月十日玉山顧瑛謹識



國家圖書館, NATIONAL CENTRAL LIBRARY, TAIWAN, R.O.C.